



PNTL

REVISTA 15

Polícia Nacional Timor-Leste
Ita nia Polícia 2017

Editorial	3
Mensajen	4
Estadu TL Kondekora PNTL	6
Diskursu PR RDTL iha Aniversariu PNTL ba Dala 17	8
VPU atende Vitima Bazeia ba Keixa	10
Estatístiku Nasional Insidente no Tránsito 2017	11
PNTL Iha Asaun	12
CCTV Reprezenta PNTL nia Matan	14
Vizita PR RDTL Mai Kuartel Jeral PNTL	15
PNTL Uza Metodu Presuasivu Rejolve Problema	16
Ajente Rekruta PNTL nain 184 Kompleta Kursu	17
Pakote tinan 5	18
Membru BOP nain 39 Simu Graduasaun	19
Kaptura Fujitivu nain 2 POLRI Agradese PNTL	20
PNTL Asegura Seguransa ba Prosesu ELPAR	20
NOP Reforsa Baze Legal Servisu iha Nivel	22
Komunidade	22
PNTL Implementa Lei Nu.5/2017 Hodi Redus Krimi	23

REVISTA PNTL

Responsavel Jerál

Komandante Jerál PNTL
Komisáriu Julio da Costa Hornay

Diretór

Komandante Relasaun Públika PNTL
Insp. Xefe Honorio Assis Barreto

Hordenador

Insp. Francisco Martins
1o Sjt. Julia Moniz

Editór

Lindalva de Deus Belo Assis

Jornalista

Victoria Maia de Jesus

Grafismu

Ajt. Estevão Pereira

Fotografia

Ajt. Tomas Maia Rodrigues
Ajt. Jeremias dos Santos
Ajt. Estevão Pereira
Ajt. Melquiades do Nascimento

Sekretariadu

Ajt. Melquiades do Nascimento

Relasaun Públika no Midia PNTL

Rua Jacinto Candido - Caicoli - Dili

Website: **www.pntl.tl**

Email: **koaliaho@pntl.tl**

Nú. Kontaktu: **77 312 433**

77 394 446

77 325 881

sumário 15



Loron kmanek maluk lee na'in sira hotu, ami haksolok tebes hodi hasoru malu fali ho maluk sira liu husi Revista PNTL Edisaun 15, ne'ebe sei oferese informasaun kona-ba atividade PNTL nian iha Nasional no mos Munisípiu hotu.

Tinan 2017 PNTL celebra aniversariu ba dala 17, idade ne'ebe joven no maduru ba dadaun iha nia servisu nu'udar instituisaun seguransa ho nia misaun atu asegura seguransa ba povu no nasaun ho nia riku soin tomak, ho sakrifisiu no dedikasaun ne'ebe maka PNTL nia emar sira fo maka Estadu Timor-Leste fo rekoñesementu hodi kondekora instituisaun seguransa ne'e ho Medalla Ordem de Timor-Leste nu'udar rekoñesementu ba servisu no dedikasaun

membru PNTL nian hodi fo seguransa ba povu no nasaun hodi asegura seguransa no ordem pública.

Aleinde ne'e iha edisaun ida ne'e ami mos fo sai informasaun kona-ba Funsau CCTV hodi monitoriza asidente no insidente iha kapital Dili, sitamos kona-ba vizita Prezidente Republika RDTL mai Kuartel Jeral PNTL.

Atu kompleta liu tan nesedidade publiku ba informasaun liu-liu kona-ba sevisu PNTL nian maka ami mos oferese ba le'e nain sira informasaun kona-ba PNTL implementa Lei Nu. 5/2017 rejime juridiku ba pratika Artes Marsiais, Rituais, Armas Brancas no Rama Ambon hodi redus krime no konfliktu entre Arte Marsiais.

Regularmente fo sai estatística krime no asidente ne'ebe akontese iha território tomak atu nune'e públiku bele hatene hodi tau atensaun no prevene, tanba seguransa la'os PNTL de'it mak responsabiliza maibe, ema ida-idak sei tau iha konxiensia katak seguru ba nia vida importante liu.

Maluk le'e nain sira ksolok tebes iha biban ida ne'e hodi hatutan informasaun ba ita boot sira atu nune'e bele akompania lalaok no servisu instituisaun seguransa ne'e hodi nune'e bele asegura estabilidade, paz no moris hakmatek ba povu no nasaun. Hamutuk ita kontribui ba paz no estabilidade iha ita nia rain.

Obrigadu barak.

Inspektór Xefe **Polísia Honório A. Barreto**
Xefe Relasaun Públika PNTL

Polisia Nasional Timor-Leste ohin festeja nia tinan ba dala sanulu resin hitu (17). Moris besik tinan rua nulu ona, durante periudu ida ne'e instituisaun PNTL lao hamutuk ho transformasaun ita nia sosiedade buka atu servi ba publiku tuir prinsipiu ne'ebe hatur ba, hahu nia kriausaun, atu defende lagalidade demokratika no garante seguransa sidaduun sira nian no nafatin apartidaria la inklina ba ida ne'e ou ida neba.

Durante tinan 17 moris, Instituisaun hasoru buat barak, setor sosiedade timor nian balu maka la dun entende diak, hetan kritika hosi ema barak, wainhira PNTL envolve-an iha kriji 2006, maibe ho tempu no experiencia ne'ebe iha mai tau nia-an hanesan forsa seguransa no halo parte iha misaun internasional ba manutensaun apoiu ba paz no jestaun kriji.

Nia kapasidade atu sai hanesan Força Seguransa ida ne'ebe ema respeita no competente bele hetan liu husi mane no feto sira ne'ebe serve-ba, ho sira nian disponibilidade tomak, espiritu de misaun ne'ebe as, no dala barak tau iha risku sira nia integridade fisika no limite ba sira nia vida rasik.

Halo buat barak liu hosi formas oi-oin tamba PNTL durante nia existensia nafatin hatan hodi asumi tan responsabilidade no servisu sira seleu mesmu ke todan no la enkuadra iha misaun normal forsa seguransa ida nian.

Iha area investigasaun: Atu desenvolve asaun investigasaun kriminal ou prevene kriminalidade ne'ebe perturba no kausa ba alarme sosial, liu hosi asaun polisiamentu komunitariu kontribui ba hatun numeru asidente iha ita nia estradas no indikator estatistiku kona-ba ameasa ida ne'e hodi luta nafatin hasoru krimi transnacional liu husi vijilansia, patrulhamentu no intervensaun iha rai no tasi, nune'e mos prevene no investiga krimi ne'ebe mosu iha fronteira, membrus PNTL nafatin hatudu ba publiku, sira nia valor nudar forsa no sira nia dedikasaun ba servisu, ohin ita celebra Polisia nia loran ita celebra ba nia memoria, maibe liu-liu celebra ba feto no mane sira ne'ebe serve ba Instituisaun ida ne'e.

Halo iha fatin barak, iha kuartel sira namkari iha pais laran kona-ba sira nia laran badinas dedikasaun ba servisu publiku, no fiel hodi hatudu espiritu misaun PNTL, atu kaer metin relasaun hakbesik ba populasuun iha ne'ebe sira hela-ba, hodi atende ba sira nia problema, ne'ebe halo sira la hakmatek no dala ruma sira halo liu tia sira nia kompetensia hanesan ajente ne'ebe iha autoridade.

Senhor Presidente, Senhor Primeiro-Ministro, senhor Ministro do Interior, senhores convidados, Excelências,

Tuir tradisaun, iha serimonia ida ne'e sei halo balansu jeral ba atividade ne'ebe desenvolve tia ona. Tradisaun ida ke naturalmente ami ho orgulhu sei kumpri, hodi hateten katak PNTL hanesan Força Seguransa iha kompetensia tomak wainhira Força ONU nian husik ita. hodi kaer rasik buat ne'ebe ita hakarak atu halo ba ita nian rain..

Plano Estratégico Desenvolvimento 2014 – 2018

PNTL nian ho nia objetivu lima (5) ne'ebe difini tia: Lejislasaun, Formasaun, Administrasaun, Disciplina no Operasaun sai hanesan prioridade liu iha prioridade sira seluk.

Iha ambitu Formasaun halo kursu oin-oin iha estranjeiru hosi entidades externa, PNTL realiza kuartu (40) Kursu ba Formasaun Ajudantes, Kursu especializasaun ba elementus UEP, UPF no UPM iha diferenzia ba foun sira ne'ebe integra ba Unidade no lao desde agostu Primeiru Kursu Formasaun ba Sarjentus ne'ebe inklui mos elementu sira hosi pais CPLP, 4 hosi São Tomé e Príncipe, no 3 hosi Guiné-Bissau.

Ba ambitu objetivu administrasaun nian, iha dinamizasaun ba carreira membrus PNTL hodi halo promosaun tuir antiguidade depois hetan aprovasaun Regulamento Avaliasaun ba Meritu membrus PNTL, no hare atu garante mos promosaun por escolha

Iha parte operacional ita desenvolve no implementa video vijilansia CCTV, hodi monitoriza no reduz kriminalidade, i kontrolu ba transitu iha cidade Dili.

Durante tinan 2016 rejista total infratores 11.398, sae tia ba 4.206 kompara ho tinan 2015. Hosi infratores sira ne'e, 10.756 ba selu (koima) iha BNU ho total \$323.980,-00 valor ida ke bo'ot liu dala tolu iha tinan 2015. Durante tinan 2016 PNTL halo operasaun 448 ba kontrolu sirkulasaun transitu no Chepoint ba kareta no motorizada privadu no Estado. Detem ema sira ne'ebe ligadu ba artes marseais no kasu rama ambon, nune'e ema sente seguru iha Timor-Leste. Servisu hirak ne'e barak halo iha Dili, sidade ke ho populasuun barak liu i mos asidente.

Iha ambitu disiplina nian, halo esforsu atu kumpri regulamentu disciplinar hodi aplika normas ne'ebe ke iha ho efikaz. Nia resultadu aplika 50 penas ba suspensaun, 8 penas ba multa repreensaun eskrita 30 iha proposta 16 ba demisaun membrus PNTL. I mos halo auditorias, avaliasaun, inspesaun no investigasaun-preleminar ne'ebe nia objetivu prinsipal atu melhora funsionamentu internu no garante legalidade ba prosedimentu

Iha 2016 konsentra mos ba iha servisu avaliasaun, planeamentu no preparasaun, transforma Instituisaun PNTL, remodela nia Lei Organika no Regulamento Disciplinar, halo proposta ba estatutu membrus nian, desenha planu ba uniforme ida modernu no adekuaudu ba aktividade polisia nian, no hahu aplika Regulamento Avaliasaun Meritu ba membrus. Iha periudu ne'e kontinua desenvolve nia atividade normal ho diak hodi to'o mai iha seguransa ba eleisaun suku no eleisaun presidencial.

Servisu hirak ne'e sei la bele halo ho diak se laiha apoiu parseiru desenvolvimentu sira nian hanesan Nasoens Unidas, Guarda Nacional Republicana, TLPDP Australia, TLCPP Nova Zelândia, Asia Foundation, Embaixada Chinesa, Embaixada America, JAICA Japaun, Telemor, ba sira hotu hato'o ita nia obrigadu barak.

Ami agradece no louva ba apoiu no kolaborasaun nebe efetivu hosi orgaos no autoridade governu li-liu Ministeriu Interior, i ami fiar katak sei bele halo diak liu tan ba oin no aprende hosi buat nebe halo liu tia iha fula 12 hodi lao ba ita nia objetivu no prioridade nebe difini ona.

Membros PNTL: Hau hakarak hato'o ba imi hotu parabens ba imi nia servisu nebe diak tebes liu hosi imi nia profesionalismu, dedikasaun ba servisu durante periudu Eleisaun Presidencial, la ho imi nia servisu makas no dedikasaun, ita labele tau hakmatek no ordem sosial iha Timor-Leste iha momentu ida nebe importante ba ita hotu.

Hau hatene no sente saida maka imi hakarak i hau fahe ho imi preokupasaun nebe imi manifesta liu hosi imi nia disponibilidade no esforsu hirak ne'e. Ne'e maka buat nebe ita hakarak

Hau fiar katak buat nebe imi hakarak sei iha nia resposta iha tempu mai, hodi dignifika estatutu carreira membru PNTL.

Ho desenvolvimentu teknolojia nebe iha hodi halo materiais oi-oin, maibe ema maka kontinua sai fator determinante ba kualker organizasaun. Ninia efisensia no susesu sei depende nafatin ba elementus nebe servisu ba ho sira nia matenek, kompetensia, espiritu inisiativa no profesional.

Signifika katak PNTL sei sai ida nebe ita hotu hakarak. Fiar nebe timor oan sira tau mai ita iha ita nia hahalok no respeito, husu mai ita atu labele lakon vontade no determinasaun ba kombate krimi no labele hases-an atu fo apoiu ba populasuun iha situasaun emerjensia no kalamidade publika. Hau fó hanoin ba imi nudar membru PNTL atu imi hamutuk ho hau iha vontade no hakarak atu servi Timor-Leste la ho objetivu seluk, maibe hakarak ita nia pais ida seguru nebe ema hotu iha konfiansa.

Excelentísimos convidados,.

Atu termina intervensaun, hau fiar katak membrus PNTL hotu simu no hatan ba alerta nebe hau fó iha leten nune hodi imi nafatin kumpri misaun atu iha tinan oin mai bele halo balansu ida positivu liu nebe ohin apresenta. Ne'e laos atu hatan iha momentu ida nebe ita celebra, maibe resulta husi saida maka Instituisaun fo ona mai ita no kompromisu atu nafatin aseguar ita nia populasuun hodi fo kondisaun ba seguransa no hakmatek iha estadu de direitu no sosiedade ida livre no demokratika.

Desisaun no profesionalismu nebe hatudu iha ita nia misaun sai testemunha ba ita nia lalaok servir Timor-Leste no garante atu ema hotu kontinua laran metin ba polisia; "servir no protejer maka ita nia intensuun"

Estadu Timor-Leste

Kondekora PNTL



“Hau hato’o agradesementu ba PNTL ne’ebe simu dever no disponibilidade maka’as atu proteje no servi sidadaun no nasaun ho profesionalismu no dedikasaun”

Taur Matan Ruak

Prezidente da Republika Demokratika de Timor-Leste

Estadu Timor-Leste kondekora instituisaun Polisia Nasional Timor-Leste (PNTL) ho Medalha Ordem de Timor-Leste nu’udar rekoñesimentu ba servisu no dedikasaun membru PNTL nian hodi fo seguransa ba povu no nasaun hodi asegura seguransa públika.

Kondekora ne’e nu’udar sinal agradesementu ba PNTL ne’ebe simu dever no disponibilidade atu proteje no servi sidadaun no nasaun ho profesionalismu no dedikasaun.

Prezidente Republika Taur Matan Ruak hateten Kondekora ne’e nu’udar rekoñesimentu estadu ba instituisaun seguransa ne’ebe maka loron-loron koopera no servisu maka’as hodi hametin seguransa iha rai laran, hametin legalidade demokratika, tane ass no asegura identidade nasional liu husi kapasidade hodi servi povu no nasaun, Nia hato’o asuntu ne’e liu husi deskursu ba serimonia aniversariu PNTL iha Centru Formasaun Polisia Comoro Dili Segunda (27/03).

Taur haktuir tan katak rekoñesimentu Publiku ne’ebe maka hau fo iha serimonia ida ne’e hodi kondekora instituisaun ho Colar Ordem de Timor-Leste no Pre-ensigna ba Estandarte Nasional hanesan sentimentu gratidaun ida ne’ebe justu hodi fo rekoñesimentu ba PNTL liu husi jestu ida ne’e.

Iha okajiaun ne’e Prezidente Republika kondekora mos Komandante Jeral PNTL Komisariu Polisia Julio da Costa Hornay ho medalha Ensigna de Ordem Timor-Leste ba servisu ne’ebe nia presta ona ba nasaun iha Komandu

Jeral PNTL.

Prezidente Republika kondekora mos Oficiais Superior PNTL nain 19 ho medalha de Servisu Distintos grau Ouro no Medalha de ordem Servisu Distintos grau Prata ba Inspector, Sarjentu no Ajente Xefe nain 12.

Kondekora mos Vice-Ministru Administrasaun Estatal Tomas do Rosario Cabral ho Medalha de Mérito de Segurança Pública 1a klase no Medalha de Mérito de Segurança Pública 4a klase ba Primeiro-Sarjentu das F-FDTL Celestino Fraga no Ajente-Chefe Nelson Carlos Amaral.

Iha okajiaun ne’e Prezidente Republika mos kondekora sidadaun estrajeiru ne’ebe maka kontribui ba servisu seguransa hanesan Superintendente Paul Jorge Dickinson Polisia Federal Australia, Superintendente Kevin Joseph Brenan Polisia Nova Zelandia, Maijor Felisberto Antonio M.P. Contente GNR no kompania TELEMOR.

Serimonia kondekora ne’e kompleta ho kondekora Medalha de Komportamentu Exemplar ba Inspetor Lucia de Fatima Ximenes, Sarjentu Domingos Maia no Ajente-Chefe Albertino das Neves.

Serimonia Aniversariu PNTL ba dala 17 ne’e Partisipa husi Primeiru Ministru, Ministru Interior, Ministru Defeza, Maijor General F-FDTL, Prokurador Jeral Republika (PJR) Jose da Costa Ximenes, Representante Prezidente parlamentu Nasional, representante Prezidente Tribunal Rekursu, membru governu, Korpu Diplomatu, parseiru

Photo : Melquiades do Nascimento PNTL

Diskursu Prezidente Republika iha aniversariu **PNTL** ba Dala-17



Photo : Melquiades do Nascimento PNTL

Iha momentu ita celebra aniversariu Polisia Nasional Timor-Leste (PNTL) ba dala-17 hau hakarak hato'o saudasaun espesial ba polisia no sivil sira ne'ebe loro-loron kopera hodi hametin seguransa iha rai laran no hametin legalidade demokratika no tane a'as e asegura identidade nasional liu husi sira nia kapasidade hodi servi povu no nasaun.

Klima seguransa so bele sai posibel tanba kna'ar importante ne'ebe hala'o husi PNTL hamutuk ho F-FDTL no kontribuisaun husi povu hodi asegura ambiente ne'ebe hakmatek independensia no neutralidade.

Ohin Onra bo'ot ba Prezidente Republika (PR) hodi mai hamutuk hodi celebra aniversariu PNTL hodi fahe signifikadu serimonia ida ne'e nian hodi reafirma importansia husi misaun hotu-hotu ne'ebe forsa servisu seguransa hala'o ona no hato'o apresiasaun ba sira nia dedikasaun no sakrifisiu iha tempu ne'ebe sira hala'o sira nia misaun.

Hau hato'o agradesimentu ba PNTL ne'ebe simu dever no disponibilidade maka'as atu proteje no servi sidadaun no nasaun; Hametin kooperasaun bilateral no multilateral ho forsa no servisu seguransa nasaun seluk nian hodi hametin PNTL nu'udar instituisaun ida ne'ebe importante ba seguransa publika ba paz no estabilidade.

Prosesu konstrusaun ba estado demokratiku hanesan Timor-Leste ne'ebe mai husi periodu ida ne'ebe nakonu ho konflitu no dejafiu ekonomiku, politiku no sosial oin-oin inklui problema seguransa rai laran ne'ebe bele hamosu sentimentu insiguransa tanba ne'e prezisa sira nia profesionalismu no dedikasaun, hau hahi'i esforsu ne'ebe PNTL halo hodi hasa'e kapasidade rekursu humanus, halo atividade operacional sai efikas liu tan, no hadia kondisaun servisu membru PNTL nian no intensifika programa Polisiamentu tuir modelu Vizivilidade Involvementu no Profesionalismu (VIP).

Liu husi oportunidade ida ne'e hau hato'o agradesimentu bo'ot ba ministru Interior Longjunhos Monteiro ba profesionalismu, kompetensia no dedikasaun ne'ebe nia uluk hatudu nu'udar Komandante Jeral no sei hatudu nafatin nu'udar ministru hodi presta servisu ne'ebe ass ba nasaun no instituisaun PNTL.

Hau hakarak mos hato'o lia fuan apresiasaun ba Komandante Jeral Komisariu Polisia Julio da Costa Hornay nomos ba Segundu Komandante Komisariu Polisia Faustino da Costa ba apoiu bo'ot tebes ne'ebe fo mai hau durante hala'o hau nia knaar.

Tuir konstituisaun Prezidente Republika maka garante independensia nasional, unidade estado nian instituisaun demokratika nia lalaok regular no mos kumprimentu ba prinsipiu estado de direitu tanba ne'e PR fo fiar ba forsa no seguransa sira liu-liu polisia atu hametin ordem publika paz sosial no seguransa comunidade sira nian.

Seguransa hanesan kestaun importante tebes iha ita nia estado maibe sei la limita deit ba buat hirak ne'e, seguransa hanesan direitu fundamental sidadaun hotu nian ne'ebe estado tenke promove no asegura tanba laiha seguransa maka laiha moris diak, estabilidade no dezvoltamentu ekonomiku, laiha seguransa maka sei laiha demokrasia.

Estado liu husi governu nia misaun prinsipal atu asegura no tau matan ba seguransa sidadaun hotu nian hodi respeitu sira nia direitu fundamental sira.

PNTL iha dever atu adapta sira nia aan ho realidade no lalaok tuir nesiedade sosiedade nian, Polisia tenke buka konseitu foun kona-ba seguransa ba defeza no protesau sosiedade sira nian ne'ebe sei involve comunidade tomak no orienta bazeia ba pontu fundamental tolu (3) husi politika Siguransa Interna, Sidadania modernizasaun no Proximidade.

Sidadania tanba ohin loran sidadaun sira pertense ba sosiedade ida ne'ebe global no globaljadu oras ne'e daudauk ita infenta hela problema Dezsidadania ita hare'e katak ohin loran sidadaun sira komesa neneik-neneik lakon ona sentimentu pertensa ba comunidade ida, ida ne'e bele sai hanesan kauja prinsipal ba insiguransa nasaun ida nian. kestaun siguransa ka insiguransa laos problema ida ne'ebe Polisia deit mak tenke rejolve ida ne'e hanesan problema ida ne'ebe liga ba sosiedade no siviljasaun nasaun ida nian hodi investe iha forsa sira nia modernizasaun no mos iha dignidade kna'ar polisia nian ita tenke investe maka'as liu tan iha infrastrutura no ekipamentu ne'ebe prioritariu atu hasa'e forsa sira nia kapasidade operacional no valoriza ajente sira nia karera hodi rekonese kondisaun Polisia nian.

Hau apela ba governu atu kontinua tau matan ba situasaun Polisia Fronteira nian iha mudansa maibe prezisa tan ita nia esforsu no apoiu para dignifika UPF tanba sira servisu lor-loron laos mesak maibe servisu iha oin no matan nasaun vizinu Indonezia.

Politika proximidade estado no sidadaun hare'e liu ba oinsa estado no sidadaun sira bele hakbesik malu hodi halo sidadaun sira sente integradu liu tan no simu medidas ne'ebe maka hola husi poder sentral hasoru kriminalidade liu husi kontribuisaun husi sosiedade hotu.

Kriminalidade hanesan problema ida ne'ebe bele resolve ho modelu polisiamentu proximidade ne'ebe foka liu ba halo prevensaun duke hein to'o problema mosu maka halo atuaun, nune'e tuir hau nia hanoin importante liu maka Polisia kaer metin ba prinsipiu sira ne'ebe difini Polisiamentu Komunitariu atu nune'e bele hasae sentimentu siguransa iha

komunidade sira nia le'et no hamenus kriminalidade.

Hau aproveita oportunidade ida ne'e fo parabens ba servisu Polisia Komunitaria nian maske sira enfrenta difikuldade bo'ot, barak laiha hela fatin, laiha komunikasaun no transporte ida diak maibe sira hala'o servisu ho profesionalismu no dedikasaun, PR louva komprimisiu no dedikasaun hirak ne'e.

Iha aspetu tolu (3) ne'ebe ita tenke fo atensaun maka hanesan asaun Komandu no lideransa ne'ebe tenke esklaresidu, forsa no servisu seguransa sira nia koezaun no disiplina no Rekursu humanus nia formasaun no espesializasaun ne'ebe tenke sai hanesan rekursu estratejiku ho objetivu atu hasa'e qualidade servisu ne'ebe maka presta ba ita nia sosiedade.

Ita hotu hakarak Timor oan sira seguru liu nune'e sira sente katak estado sei iha kapasidade atu prevene no halakon kriminalidade hodi respeita sidadaun sira nia liberdade, direitu no garantia sira, resposta ida ne'ebe diak ba ameasa, risku no dezafiu sira ne'e ejiji forsa sira organiza aan tuir modelu seguransa koperativu ida ne'ebe foka liu ba ema no nesiedade atu defende sira nia moris, sasan no manera atu moris.

Atu hari'i seguransa ho rekursu publiku ne'ebe limitadu tebes, ita presija halo jestaun rekursu sai efisiente liu tan iha area intervensaun hotu-hotu esepasaun hirak ne'e tenke rigoroju hare liu ba oinsa atu uza rekursu ne'ebe maka ita iha inklui mos hamosu reforma hirak ne'ebe sei kontribui ba hasa'e kapasidade operacional.

Ita prezisa define estratejia foun kona-ba seguransa nasional hodi aproveti didiak kapasidade ne'ebe ita iha ona bazeia ba konseitu polivalesia, fleksibilidade interdependensia no komplementaridade rekursu .

Foin lalais ne'e governu aprova konseitu estratejiku defeza no seguransa nasional ne'ebe bazeia ba vizaun tau hamutuk sistema seguransa militar, sistema seguransa interna, sistema informaun, sistema justisa no sistema protesau sosial inklui fator politiku, ekonomiku no sosial ne'ebe kontribui atu atinji seguransa nia objetivu estratejiku sira.

Hau fiar katak konseitu hirak ne'e nudar mata dalan ba

estado nia estratejia global no hanesan referensia ida ba estratejia setorial sira sei dudu atu ita avalia hikas instituisaun defeza no seguransa estado sira nia papel no kna'ar no mos atu halo revijaun ba pratika no kapasidade hirak ne'ebe sei presija atu dezenvelope.

Membrus PNTL feto no mane ita moris hela iha nasaun ida ne'ebe maske sei nurak maibe aprende husi sala ida ne'ebe halo tia ona no agora daudaun konsidera hanesan rai ida ne'ebe seguru no hakmatek, dala-ruma ita haluha katak ita nia manera moris, liberdade, estabilidade no hakmatek ita deve ita nia forsa de seguransa sira.

Ohin ita mai hamutuk iha fatin ida ne'e hodi fo homenajen ba ita nia demokrasia nurak ida ne'e no nia konsolidasaun liu husi kna'ar ne'ebe hala'o husi PNTL hodi hametin legalidade demokratika, seguransa rai laran no Timor oan sira nia direitu nune'e nu'udar PR hau hakarak fo sasin kona-ba kompetensia no lealdade ne'ebe maka Polisia sempre hatudu mai hau,

Hau hakarak mos fo homenajen ba sira feto no mane ne'ebe loran-loran fo sira nia kontribuisaun maske dala-barak laiha rekoñesimentu no ariska sira nia moris hodi defende no hadia sidadaun sira nia moris atu nue'e Timor-Leste bele sai hanesan estado de direitu demokratiku.

Hau fiar katak rekoñesimentu Publiku ne'ebe maka hau fo iha serimonia ida ne'e hodi kondekora instituisaun PNTL ho Colar Ordem de Timor-Leste no pre-ensigna ba Estandarte Nasional hanesan rekoñesimentu ne'ebe justu.

Hau uza oportunidade ida ne'e atu kondekora mos Komandante Jeral PNTL Komisariu Polisia Julio da Costa Hornay ho medalha Ensigna de Ordem Timor-Leste ba servisu hirak ne'ebe nia presta ona ba nasaun iha Komandu Jeral PNTL.

Iha momentu despedida ida ne'e PR hatene katak PNTL fo prestijiu no dignidade ba ita nia rain no povu no sei kaer metin nafatin prinsipiu sosiedade ida ne'ebe justu livre, no seguru liu. Imi nia dezempeñu hanesan motivasaun ida ba Timor oan sira hotu sente konfiansa no orgullu liu tan iha tempu oin mai Maromak sei tulun imi, imi nia familia no PNTL tomak.



Photo: Ajente Estevao Pereira PNTL



VPU Atende Vitima Bazeia Ba Keixa

Unidade Ema Vuneravel ou Vulnerable Person Unit (VPU) atende vitima Violensia bazeia ba Jeneru bazeia ba keixa husi vitima ou nia familia ka ema ruma ne'ebe maka hatene krime ne'e nia lalaok.

Violensia domestikika, inklui violensia fiziku, seksual, psikolojiku, no ekonomia Kontestu Violensia Bazeia ba Jeneru maka violensia hasoru fefo, mane ka labarik ida bazeia ba ninia estadu subordinasun iha familia no sosiedade laran ho tipu krime hanesan Abandona ka expozisaun, ofensas ba integridade fizika simples, Mau stratus ba Inkapaz, Mau stratus ba konjuje (violensia Domestika), Mau stratus ba Menor, Ameasa, Koasaun (Obriga), Sekuestro, Raptu, Eskravidade, Trafiku Umanu, Trafiku ba Orgaun Umanu, fa'an ema (Trafiku Humano), Tortura ka Tratamentu Kruel degraante ka dezumanu, koasaun Seksual (obriga relasun seksual), Violasun (Violasun Seksual) Explorasun Seksual ba Ema seluk, prostituisun Infantil(labarik), pornografia Infantil (labarik), abuzu Seksual ba Menor, Atku Seksual ba Adolezente, Abuzu Seksual ba Ema nebe labele Reziste, Fraude de Sexual no Ezibisionizmu Sexual.

Hanesan defini iha Kodigu Penal, lei ne'e mos klarifika katak violensia domestikika mak krimi publiku signifika katak wainhira akontese violensia domestikika ema hotu-hotu bele halo keixa ba polisia, la'os deit vitima. Polisia bele halo atuasaun direktamente la hein keixa husi vitima ka sasin nain sira. Se karik akontese violensia domestikika, lei ne'e fo prioridade atu halo prosesu iha sistema justisa formal. Lei mos garante protesun ba sasin nain no konfidensialidade ba vitima.

Kazu violensia bazeia ba jeneru regula iha kodigu Penal Artigu 143 Abandona ka expozisaun, 145 ofensas ba integridade fizika simples, 153 Maus-tratus ba Inkapaz, 154 Maus-tratus ba konjuje, 155 Maus-tratus ba Menor, 157 Ameasa, 158 Koasaun, 160 Sekuestro 161 Raptu, 162 Eskravidade, 163 Trafiku Umanu, 165 Trafiku ba Orgaun Umanu, 166 fa'an ema, 167 Tortura ka Tratamentu Kruel degraante ka dezumanu, 171 koasaun Seksual, 172 Violasun, 174 Explorasun Seksual ba Ema seluk, 175 Prostituisun Infantil, 176 Pornografia Infantil, 177 Abuzu Seksual ba Menor, 178 Atku Seksual ba Adolezente, 179 Abuzu Seksual ba Ema inkapaz nebe labele Reziste, 180 Fraude de Seksual, 181 Ezibisionizmu Sexual.

Alende regula iha Kodigu Penal Espesifikamente Violensia bazeia ba Jeneru regula mos iha Lei kontra Violensia Domestika Lei Nu. 7/2010

Husi tipu kazu 24 ne'e kazu ne'ebe maka ass liu no rejista iha VPU maka kazu Maus Tratus ba Konjuje (Violensia Domestika) hamutuk 522;

Estadu mos hetan obrigasun atu proteze no fo asistensia ba vitima sira. Ho intensun atu proteze membru familia husi violensia domestikika, inklui violensia husi espoza, eis-espoza, oan sira, parentes, no ema seluk ne'ebe servisu iha uma laran (Empregada). Kona-ba prevensaun, Polisia iha obrigasun espesial atu prevene no proteze vitima.

Inspetor Jeral Superintendente Xefe Carlos Almeida Sousa Jeronimo esplika mekanismu prosesu atendimentu ba vitima Violensia bazeia ba Jeneru, bainhira vitima ka ema ruma hato'o keixa ba Polisia VPU maka Polisia halo identifikasun pessoal ba vitima no husu informasun kona-ba krime ne'ebe maka akontese hafin Polisia VPU lori kedas vitima ba iha PRADET atu halo tratamentu saude no ezame mediku hafin foti vitima nia informasun relasun ho krime ne'ebe akontese depois halo kedas Auto de Notisia hodi haruka ba Ministeriu Publiku atu prosesu tuir lei ne'ebe maka vigora.

Iha prosesu atendimentu Polisia VPU servisu hamutuk ho parseiru sira hanesan PRADET, Casa Vida, Fokupers, Alfela no seluk tan nune'e bainhira Polisia VPU simu kaixa husi vitima maka sei referal ba parseiru hirak ne'e.

Iha tinan 2016 Polisia VPU atende kazu hamutuk 627 no iha tinan 2017 kazu hamutuk 272 total kazu ne'ebe maka rezistradu hamutuk 899 no kazu hirak ne'e Policia VPU rejista ona iha Ministeriu Publiku hodi halo prosesu.

Iha prosesu atendimentu ba vitima sira VPU enfrenta problema oin-oin maka hanesan falta transporte atu lori vitima sira ba Uma Mahon, Ministeriu Publiku no Tribunal ou lori notifikasun ba intervenientes sira.

VPU mos laiha Telefone fixu nune'e ofisial sira uza telefone privadu hodi notifika intervenientes sira no telefone ba Prokurador hodi konsulta kazu ruma nune'e mos orsamentu atu sosa hahan ba vitima sira nune'e ofisial VPU sempre hasai sira nia osan hodi sosa hahan ba vitima no mos selu taxi ba vitima fila ba uma

Alende ne'e VPU mos laiha fatin propriu ba labarik sira ne'ebe maka konflitu ho lei tanba iha deit sala entrevista ida

Situasun hirak ne'e difikulta servisu VPU nian tanba ne'e atu solusiona problema hirak ne'e ofisial VPU hein Transporte husi unidade Servisu Investigasun Kriminal (SIK) no dala-ruma uza transporte privadu.

Antes termina Inspector Jeral ne'e husu ba comunidade sira ne'ebe maka rona no hare'e direta bainhira krime akontese atu fo informasun ba Polisia nune'e bele proteje vitima no lori autor ne'ebe halo krime ba prosesu hodi nune'e bele redus no minimiza Violensia Bazeia ba Jeneru.

Estatistiku Nasionál Insidente no Tránsito 2017

RELATORIU

Estatistiku Insidente Nasionál 2017

Munisipiu	Janeiru	Fevereiro	Marsu
Aileu	5	8	3
Ainaro	13	5	5
Baucau	19	11	12
Bobonaro	13	9	12
Cova Lima	12	8	13
Dili	106	107	133
Ermera	23	25	24
Lautem	4	8	5
Liquica	23	12	16
Manatuto	19	11	8
Manufahi	0	3	3
Oecusse	30	27	31
Viqueque	16	14	8
TOTAL	283	248	273

Estatistiku Tránsito Nasionál 2017

Munisipiu	ASIDENTE HOTU-HOTU			VITIMA NE'EBÉ KANEK			ASIDENTE FATÁL		
	Jan	Feb	Mar	Jan	Feb	Mar	Jan	Feb	Mar
Aileu	5	5	6	10	7	14	0	0	0
Ainaro	3	2	3	1	0	1	0	0	0
Baucau	19	15	14	72	13	17	1	1	1
Bobonaro	5	7	3	9	10	5	0	0	0
Cova Lima	6	0	1	8	0	0	0	0	0
Dili	90	110	79	90	110	74	4	5	2
Ermera	3	6	6	2	7	4	0	1	0
Lautem	3	3	5	4	3	5	1	1	2
Liquica	7	10	14	8	20	14	0	0	0
Manatuto	2	1	8	1	1	5	0	0	0
Manufahi	4	1	5	11	2	6	0	0	0
Oecusse	0	1	1	0	1	2	0	0	0
Viqueque	2	2	1	2	0	0	0	0	0
TOTAL	149	163	146	218	174	147	6	8	5



Photo: Melquiades do Nascimento/PNTL

Partisipante sira iha serimonia Aniversariu PNTL ba dala XVII



Photo: Melquiades do Nascimento/PNTL

Komandante Jeral simu Medalha Ensigna de Ordem Timor Leste



Photo: Tomas M. Rodrigues/PNTL

Komandante Jeral PNTL hato'o parabens ba Prezidente RDTL hafoin simu posse



Photo: Tomas M. Rodrigues/PNTL

Segundu Komandante Jeral PNTL fo parabens ba Prezidente RDTL foun ba periodu 2017-2022



Photo: Melquiades do Nascimento/PNTL

PNTL Halo Seguransa ba kampaña Parlamentar

PNTL iha asan



Parada deslokasaun ba seguransa eleisaun Parlamentar 2017

CCTV Reprezenta PNTL nia Matan

“Closed Circuit Television (CCTV) reprezenta Polisia Nasional Timor-Leste (PNTL) nia matan iha terenu liu-liu iha fatin ne’ebe maka Polisia la kobre maske ita la marka prezensa maibe ita nia matan iha ne’eba depois ita monitorija relasiona ho sirkumtasia seguransa no trankulidade ordem publika”

Longuinhos Monteiro
Ministru Interior

Governu Republika Popular Cina apoia kamera CCTV unidade 70 resin ba PNTL no monta iha kapital Dili hodi monitoriza asidente no insidente ne’ebe maka akontese loron-loron, ho sistema CCTV bele ajuda Polisia nia servisu hodi aseguara seguransa ba povu no nasaun.

Sistema CCTV ne’e nu’udar ezemplu koperasaun iha setor seguransa entre governu Cina ho Timor-Leste no fiar katak ho sistema teknolojia ne’ebe modernu no avansadu sei fo vantajen ba seguransa pública no estabilidade sosial iha kapital Dili no fo seguru ba povu no nasaun.

Ministru Interior Longuinhos Monteiro hateten Kamera CCTV nu’udar matan Polisia nian favorese atu determina Polisia nia asaun iha terenu hodi monitorija asidente no insidente barak ne’ebe mosu iha kalan bo’ot laiha prezensa Polisia ho CCTV ita konsege akapta imajen vivas I depois ita grava no halo justifikasaun kuandu Polisia halo intervensaun

Eis Komandante Jeral PNTL ne’e haktuir tan katak rejultadu husi imajen laos sai objetu evidensia atu apresenta iha Tribunal tanba lalaok lei no sistema iha Tribunal la aseta maibe mos la taka dalan ajuda orienta Polisia nia atividade iha terenu bele mos ho iniciativa ita nian propoin ba Tribunal karik prezisa.

Vantajen hirak ne’ebe maka mai husi frutu kooperasaun ida ne’e sei hadia liu tan polisia nia asaun, intervensaun, medidas prevensaun no medida represaun ne’ebe maka presija nesesariu atu utilija bazeia ba gravasaun hirak ne’ebe maka iha.

Antes termina Ministru Interior esperesa katak iha kooperasaun mutua ne’ebe maka governu rua halo ba interese seguransa publika iha futuru governu sei hare possibilidade atu alarga tan instalasaun kamera pelumenus 10 iha kapital munisipiu sira hodi fasilita liu tan monitorijasaun liu-liu iha atividade sira ne’ebe perteneute ou bele hamosu kestaun ordem publika.

Iha serimonia inagurasaun CCTV Embaixador República Popular Cina ba Timor-Leste Liu Hongyang hateten governu República Popular Cina iha komitmentu boot atu

fo assistensia ba Timor-Leste ho sistema CCTV ida ne’e nudar ezemplu kooperasaun iha setor seguransa nian entre governu Cina no Timor-Leste no fiar katak ho sistema teknolojia ne’ebe modernu no avansadu sei fo vantajen ba seguransa publika no estabilidade sosial iha kapital Dili no fo seguru ba povu no nasaun.

Nia haktuir tan katak hafoin entrega CCTV hirak ne’e ba PNTL tekniku husi Kompania JTE Cina sei nafatin akompañia operdor no IT sira hodi fo formasaun no halo manutensaun durante tinan tolu (3) nia laran. Sistema CCTV sei maneja no kontrola eskusivamente husi PNTL.

Entretantu Komandante Jeral PNTL Komisariu Polisia Julio da Costa Hornay hateten kamera video no sistema CCTV fo vantajen hodi bele hetan imajen sira ne’ebe liga ho kontrola situasaun hanesan naok no asaltu ba sidadaun sira.

Komandante Jeral haktuir tan katak ho apoiu sistema CCTV bele kontribui ba kombate krimi, monitoriza asidente trafiku, situasaun ne’ebe liga ho artes marsiais, rama ambon no monitoriza aktividade publika sidadaun sira nian hodi garante seguransa diak liu tan ba estabilidade sosial iha Timor-Leste.

“ CCTV iha nia gravasaun no hosi gravasaun ne ita bele hare fila-fali imajen no detekta kualker eventu no insidente ne’ebe mosu iha tempu real bele koñese nia kauza hodi bele ajuda seguransa atu halo prevensaun”.

Iha oportunidade ne’e Komandante Jeral PNTL mos agradese ba parseria ho Governu Chines, ne’ebe iha tempu badak bele monta sistema ida ke moderno no adekuaudu ba nesesidade PNTL.

Serimonia inagurasaun sistema CCTV ne’ebe maka hala’o iha fim de fulan Febereiru iha Kuartel Jeral ne’e partisipa husi Ministru Interior Longuinhos Monteiro, Ministru Defeza Cirilo Cristovão, Xefe Estado Maior F-FDTL Koronel Falur Rate Laek, Prezidente Komisaun B Parlamentu Nasional David Diaz Ximenes, konvidadus no ofisiais PNTL.



Photo: Tomas M. Rodrigues/PNTL

Vizita Prezidente República Mai Kuartél Jerál PNTL

Komandu Polisia Nasional Timor-Leste (PNTL) ba dahuluk hetan vizita husi Prezidente República Dr. Francisco Guterres Lu-Olo ne’ebe maka akompañia husi Primeiru Ministru Dr. Rui Maria de Araújo no Ministru Interior Dr. Longuinhos Monteiro.

Vizita Prezidente República nian ne’e hodi hare’e dereta Instituisaun seguransa nia kondisaun durante ne’e hodi aseguara paz no estabilidade iha Timor-Leste liu-liu iha tempu kampaña no eleisaun Parlamentar tinan 2017. Presensa dahuluk Prezidente República nian iha Kuartél Jerál simu ho Parada no pasa revista ba Parada ne’ebe akompañia husi Komandante Parada Superintendente Xefe Afonso dos Santos.

Prezidente República, hamutuk ho Komandu PNTL no Ofisiais Superior PNTL nian halo sorumutu no Komandante Jerál Komisariu Polisia Julio da Costa Hornay ne’ebe hanesan nai ulun PNTL nian halo apresentasaun, hodi hato’o situasaun no kondisaun instituisaun nian durante ne’e. Dr. Francisco Guterres Lu-Olo hafoin rona apresentasaun husi Komandante Jerál PNTL, manifesta sentimentu orgullu bo’ot hodi bele hasoru malu ho estrutura tomak PNTL nian.

“Obrigado ba ita bo’ot sira nia apresentasaun ne’ebe kompletu liu no promenor liu kona-ba aktividade hotu-hotu ne’ebe ita bo’ot sira halo em partikularmente seguransa ba eleisaun parlamentar ninian, hau fiar katak ita bo’ot sira ho desenvolvimentu ida ne’ebe lao to’o iha ne’e ona hau fiar katak ita bo’ot sira sei hamutuk atu hadia diak liu tan PNTL atu nune’e bele kumpri nia misaun”, hateten Dr. Francisco Guterres Lu-Olo perante membru estrutura PNTL nian.

Xefe Estado husu liu-liu atu PNTL sempre iha terenu nafatin atu nune’e populasaun sira, atu bele lao loron ou lao kalan laiha buat ida maka bele ros/kose iha sira nia isin lolon, bainhira presensa PNTL nian iha terenu nafatin, povu ne’e fiar metin katak sira iha duni PNTL ida atu bele garante sira nia seguransa, sira nia liberdade de movimentasaun, sira nia riku-soin katak sei iha defesa husi ema att.

Iha biban sorumutu nian, nai ulun nasaun Timor-Leste ne’e halo kedas Telekoferensia ho Komandu PNTL Munisipiu Ermera, Baucau no Viqueque hodi update situasaun aktual iha kada munisipiu ba Prezidente República. Xefe Estado agradese tebes ba informasaun hotu ne’ebe maka hato’o husi Komandu PNTL munisipiu sira no husu atu bele mantein nafatin situasaun seguransa.

Hafoin halo tiha Telekoferensia, Dr. Francisco Guterres Lu-Olo asina mós livru de Onra PNTL nian no hare’e mós operasaun Camera CCTV ne’ebe maka monta iha kapital Dili ne’ebe maka monitoriza aktividade rodoviariu nian.

PR iha esperansa ba PNTL katak iha tempu oin sei hala’o servisu ho diak liu tan hamutuk ho F-FDTL ne’ebe sai hanesan forsa defesa Timor-Leste nian maibé sira iha konseitu estratéjiku defesa no seguransa nian iha ne’ebe PNTL hola parte mós ida ne’e no iha futuru governu foun mai atu oinsa bele hadia diak liu tan instituisaun rua ne’e (PNTL no F-FDTL) hodi bele kompletu malu iha servisu.

“Hau sempre husu nafatin kona-ba subsidiaridade de operasaun militares no mós hanesan kona-ba komplementaridade PNTL ho F-FDTL nian, ne’e prinsipiu ida ne’ebe mai husi konseitu estratéjiku defesa seguransa nian ida ne’ebe PNTL ho F-FDTL kaer”, subliña Xefe Estado Timor-Leste ne’e.

Komandante Jerál PNTL Komisariu Polisia Julio da Costa Hornay ne’ebe akompañia PR hateten objetivu vizita dahuluk PR nian hafoin simu pose maka hakarak atu hatene situasaun jerál iha PNTL nian, liu-liu efektivu no servisu PNTL nian importante liu kona-ba seguransa eleisaun ninian.

“Komandu informa totalmente ba PR tantu efektivu korpu komandu ninian iha munisipiu hotu no oinsa planu operasaun ba seguransa eleisaun, aktividade diariu ne’ebe maka iha, kolokasaun pesoal no situasaun jerál iha rai laran”, hateten Komandante Jerál PNTL.

Komisariu Polisia Julio da Costa Hornay espera katak iha futuru ho informasaun hotu ne’ebe maka Komandu PNTL hato’o ba PR, nai ulun sira bele apoio atu desenvolve liu tan instituisaun ida ne’e.

PNTL Uza Metodu Presuasivu Rejolve Problema

“Metodu Presuasivu katak bolu parte sira ne’ebe maka involve iha problema hodi halo negosiasaun no mediasaun hodi buka solusaun hamutuk”.

Superintendente **Justino Menezes**
Komandante Komandu PNTL munisipiu Ainaro



Komandu PNTL munisipiu Ainaro uza metodu presuasivu (mediasaun) hodi rezolve problema entre oknum membru Polisia Nasional Timor-Leste (PNTL) no Falintil Forsa Defeza Timor-Leste (F-FDTL) ne’ebe akontese iha munisipiu Ainaro iha tinan 2016.

Komandante PNTL munisipiu Ainaro Superintendente Justino Menezes hateten Maneria ka metodu ne’ebe Komandu foti atu hadia no hametin relasaun servisu liu husi komunikasaun, kooperasaun no kordenasaun maibe prosesu kriminalidade kontinua lao tuir lei ne’ebe maka vigora.

Nia haktuir tan katak rezolve problema uza metodu presuasivu lao tuir kultura Timor nian hodi dame malu institusional katak dame malu estadu no halo deklarasaun asina no le sai katak sira sei larepete tan iha futuru no hadame fali parte sira ne’ebe maka involve iha problema hodi hadia no hametin relasaun no koperasaun servisu entre instituisaun PNTL no F-FDTL iha munisipiu Ainaro.

“Metodu rezolve problema ho presuasivu hanesan metodu ida ne’ebe durante ne’e hau uza wainhira assume kna’ar hanesan Komandante Komandu munisipiu Viqueque, Baucau no agora iha Ainaro”.

Kazu agresaun fiziku ne’ebe maka akontese entre oknum membru F-FDTL ho membru PNTL iha fulan Junho tinan 2016 ho karakteristikta krime semi publiku tanba ne’e hafoin halo mediasaun no dame malu vitima sei rejisti (dada hikas/ taka) kazu ne’e bainhira Tribunal bolu vitima membru PNTL ne’e sei esklares katak kazu ne’e rezolve ona no rezultadu deklarasaun ne’e sei apresenta ba Tribunal Distrital Suai no Ministeriu Publiku.

Maibe iha dia 26 Agostu oknum membru PNTL tiru

membru F-FDTL suspeitu ne’e oras ne’e daudaun kumpri hela prizaun preventiva hodi hein prosesu ba kazu ne’e maske prosesu legal lao hela maibe relasaun entre instituisaun rua ne’e ita hadia daudauk nune’e la fo inpaktu ba seguransa iha munisipiu Ainaro.

Negosiasaun no mediasaun ne’ebe maka Komandu PNTL hala’o partisipa husi Komandante F-FDTL postu Ainaro ho Oficiais sira, Veteranus no Administrador hamutuk iha Komandu munisipiu Ainaro hodi halo mediasaun no parte sira konkorda atu perdua malu no dame malu iha lora 12 fulan Feveiru tinan 2017.

Eis Komandante munisipiu Baucau ne’e informa katak ses husi problema ne’ebe maka akontese iha tinan kotuk kooperasaun servisu entre autoridade munisipal, autoridade postu administrativu no suku ho Autoridade Seguransa diak tebes liu husi servisu vizita kunjunta ba suku 21 tama sai suku hodi halo enkontru Konsellu Seguransa Munisipal (KSM) tanba parte rua nee tenki servisu hamutuk no apoiu malu hodi dinamija no estabiliza aktividade saida deit.

Involvimentu membru seguransa voluntariu nain 262 ne’ebe maka apoiu direita Polisiamentu Komunitaria hola parte inportante ba seguransa no manutensaun Ordem Pública iha munisipiu Ainaro tanba ne’e komandu kondekora no valoriza hodi fo sertifikadu rekoñesementu ba sira katak sira ne’e prontu apoiu nafatin instituisaun Polisia hodi asegura seguransa no estabilidade iha munisipiu Ainaro,

Alende ne’e atividade Polisiamentu Komunitaria ne’ebe ninia estrutura estabelese ona iha suku ne’ebe hanaran Konselu Polisiamentu Komunitaria (KPK) estrutura sira ne’e hamutuk iha konsellu suku, agora daudaun ami vizita hotu suku 21 iha munisipiu Ainaro hodi esklares koalita no identifika problema ne’ebe maka comunidade infrenta.

Maioria problema ne’ebe maka comunidade enfrenta maka hanesan problema kazu civil, problema kazu krime publiku no semi publiku hafoin identifika problema hirak ne’e Konsellu Suku lori mai enkontru Konselu Suku ka enkontru Konsellu Polisiamentu Komunitaria hodi buka dalan oinsa atu rezolve liu husi negosiasaun ka mediasaun no buka solusaun hamutuk komforme gravidade husi krime ida-idak.

Iha tinan 2016 Komandu PNTL munisipiu Ainaro rezista kazu 123, maibe iha tinan 2017 trimestre primeiru foin mak rezista kazu 14 signifika katak iha redusaun ba kazu krime no espera katak tinan ne’e kazu menus husi 100; Mudansa husi numeru ne’e tanba proativu husi Komandu halo sosialisasaun no diálogo komunitaria iha suku, eskola no iha organizasaun hirak ne’ebe ezisti iha munisipiu Ainaro.

Antes termina dadalia ho Media Relasaun Pública PNTL Superintendente menezes husu atu ba futuru autoridade munisipiu Ainaro husi baze to iha munisipiu sira atu fo apoiu ba Komandu PNTL munisipiu Ainaro liu husi Responsavel Konsellu de Suku no Juventude sira kontinua servisu hodi asegura seguransa no estabilidade.



Ajente **Rekruta PNTL** Nain **184** **Kompleta Kursu Pakote** Tinan **5**

Politikamente V governu Konstitusional desidi ona katak tinan 2017 atu halao kursu da-lima(5) ba ajente Polisia Nasional Timor-Leste (PNTL) nu’udar kursu ikus liu iha pakote tinan 5 nia laran tanba ne’e ajente nain 184 ne’ebe maka hahu’u kursu formasaun sei kompleta kursu ne’e.

Abertura formasaun ba ajente rekruta hala’o iha lora 10/07 tuir kurikulum ne’ebe maka aprova ona kadetes sira sei tuir formasaun durante fulan neen (6) ho formador sira husi Instructor PNTL no GNR.

Komandante Jerál PNTL Komisariu Julio da Costa Hornay iha ninia intervensaun hateten kursu formasaun ajente ba membru PNTL foun sira ho kompetensia ne’ebe nesaria hodi desempeña aktividade Polisial, Nia hato’o asuntu ne’e iha serimonia abertura V kursu formasaun ajente iha CFP Comoro Dili.

Komisariu ne’e haktuir tan katak formasaun ida ne’e atu eduka no treina ajente sira nia fizika, disiplina no preparasaun mentalidade ajente rekruta nian atu sai membru efetivu PNTL.

Entretantu Komandante CFP Superintendente Arquimino Ramos iha ninia intervensaun hateten prosesu formasaun atu muda mentalidade sivil ba Polisia, liu husi sistema no politika formasaun ida ne’ebe diak no relevante ho situasaun no kondisaun ne’ebe aplika universal.

“Formasaun nivel ajente nu’udar formasaun prinsipal hodi forma karakter no kompetensia ajente Polisia hodi servi no

proteje povu, iha sistema formasaun ida ne’ebe adekua no iha kualidade hodi forma karakter individu nu’udar membru Polisia ne’ebe iha koñesimentu atu hala’o nia funsaun ho susesu”, dehan Komandante CFP.

Formasaun ne’e fahe ba bloku tolu hanesan formasaun baze, formasaun eskolar no formasaun exersisiu, formasaun baze halao iha Centru Formasaun Rairobo Postu Administrativu Atabae, Munisipiu Bobonaro.

Formasaun baze sei hala’o durante semana neen ho materia kona-ba inkorporasaun, formasaun karakteristikta, exersisiu de kampu, avaliasaun teorika e prátika, no aktividade komplementar. Segundu bloku formasaun eskolar kompostu husi módulu júridiku, tékniku professional, sosio komplementar no módulu jerál maka hanesan atividade fizika, vizita de estudo no atividade komplementar no bloku formasaun datoluk maka formasaun ezersisiu iha terenu estaji durante semana rua. Tuir planu ajente hirak ne’e sei halo graduasaun iha lora 19 fulan Janeiro 2018.

Formasaun kursu da-5 iha vaga hamutuk 239 maibe kandidatu rezerva sira ne’ebe maka tuir teste iha tinan 2015 la to’o 200 no rezultadu re-ezame mediku iha lora 15-31 Juñu 2017 kandidatu nain 184 maka passa, nain 8 elimina tanba moras, no na’in 8 la marka prezensa iha teste medicu. Hafoin abertura ajente rekruta nain 184 ne’e desloka keda ba Centru formasaun Rairobo (Postu Administrativu Atabae, Munisipiu Bobonaro).

Membru **BOP** Nain **39** Simu **Graduasaun**

Membru Batelaun Ordem Publika (BOP) nain 39 simu graduasaun hafoin remata kursu formasaun baziku Manutensaun Ordem Publika iha Unidade Especial Polisia (UEP).

Komandante Jeral PNTL Komisariu Polisia Julio da Costa Hornay hateten kursu formasaun baziku ne'e hanesan kultura bainhira membru foun integra iha Unidade ne'e tenke simu treinamentu especial ba Unidade ida ne'e nian, Komandante Hornay hato'o asuntu ne'e hafoin graduasaun ba membru BOP iha Kuartel UEP Bairro-Pite Dili Kinta (30/03).

Nia haktuir tan katak ajente BOP nain 39 ne'ebe simu graduasaun ohin sei reforsa tan efektivu Unidade Especial liu-liu iha BOP hodi asegura Eleisaun Parlamentar no atividade sira seluk ne'ebe maka presija sira nia apoiu.

"Atu fasilita servisu UEP nian Komandu Polisia Nasional Timor-Leste sosa ona ekipamentus no hein katak sei to'o mai iha tempu besik hodi distribui ba membru sira hodi fasilita sira nia servisu."

Formasaun sai papel fundamental ba PNTL, kursu formasaun Manutensaun Ordem Publika ne'e kursu especial ba Polisia atu kontrola disturbu sivil iha ambitu misaun mantein no reestabelese ordem publika hodi desenvolve kompetensia no komportamentu ne'ebe espesifiku ba hala'o funsaun.

Iha okajiaun ne'e komandante UEP Superintendente Xefi Afonso dos Santos hateten ajente nain 39 ne'e tuir kursu formasaun baziku no formasaun ordem publika durante fulan rua (2) no formador sira husi GNR no Instrutor UEP, tuir tradisaun formasaun ba UEP hala'o durante fulan tolu (3) no kontinua formasaun durante semana 6 ba Ordem Publika.

Nia reforsa tan katak hafoin graduasaun ajente hirak ne'e sei hala'o servisu iha UEP no kolokadu iha Peltaun de Apoiu no wainhira Eleisaun Parlamentar hotu maka sei fahe ba kompania Bravo iha Baucau no kompania Delta iha Bobonaro.

Tuir Planu Komandu EUP maka tenke aumenta efektivu kompletu iha BOP hodi kompleta kompania hat (4) nia membru kada kompania membru 100 resin maibe numeru efektivu ne'ebe maka iha oras ne'e daudaun sufsiente atu responde bainhira estadu presija.

Enseramentu kursu formasaun baziku ba ajente BOP ne'e kompleta ho atrasaun Teknika Manutensaun Ordem Publika hanesan Patrullamentu, Anti Terorista, Operasaun Tubulares no Inativasaun Armas Espluvivu.

Serimonia graduasaun ne'e partisipa husi komandante Administrasaun Superintendente Xefi Mateus Fernandes, Segundu komandante CFP Superintendente Asistente Emilio dos Santos instrutor GNR, komvidadus, familia graduadu no membru UEP.



Photo: Melquiades do Nascimento/PNTL



Photo: Tomas M. Rodrigues/PNTL

Kaptura Fujitivu nain Rua **POLRI** Agradese **PNTL**

Polisi Republik Indonesia (POLRI) Agradese Polisia Nasional Timor-Leste (PNTL) ba susesu hodi kaptura fujitivu nain rua ne'ebe maka halai sai husi prijaun Kerobokan Bandung Bali, Indonezia.

Inspetor Jeral Polisia, Petrus Golose husi POLRI hato'o agradese ba PNTL ne'ebe maka susesu hodi kaptura fujitivu Nikola Ilief (43) husi Bulgaria no Sayed Mohammed Said (31) husi India ne'ebe maka halai sai husi prijaun Indonezia wainhira sira kumpri hela pena prijaun.

Nia haktuir tan katak governu Indonezia agradese ba PNTL no povu Timor-Leste ne'ebe maka fo informasaun ba autoridade seguransa kona-ba fujitivu nain rua ne'ebe maka pasa husi fronteira ilegal mai Timor-Leste.

"Ba futuru governu Indonezia sei nafatin husu kooperasaun no kolaborasaun husi governu Timor-Leste tanba sei iha prijioneru nain rua seluk ne'ebe maka halai sai husi prijaun no sei buka tuir husi POLDA Bali," dehan Petrus.

Liu husi koperasaun no servisu hamutuk ne'e relasaun entre POLRI ne'ebe hola parte iha ASIANAPOL no PNTL hola parte iha INTERPOL maka relasaun Polisia nasaun rua ne'e metin no forti liutan.

Atu termina representante Governu Indonezia ne'e hateten governu Indonezia lao tuir no kumpri prosesu justisa ne'ebe maka oras ne'e daudaun lao iha Timor-Leste tanba prosesu julgamentu lao tuir lei ne'ebe maka vigora no Tribunal Dili ho Ministeriu Publiku hatudu respeitu ba sistema justisa entre nasaun rua ne'e.

Komandante Jeral PNTL Komisariu Julio da Costa Hornay hateten hafoin hala'o julgamentu iha Sabadu (24/06) Tribunal Distrital Dili Kondena fujitivu nain rua ho pena prijaun preventiva tanba fujitivu nain rua tama teritoriu Timor-Leste ilegalmente sem vistu.

"Ministeriu Publiku akompania prosesu julgamentu hafoin PNTL konfirma ba Prokurador Jeral Republika no simu orientasaun PJR hodi deporta fujitivu nain rua ne'e," dehan Komisariu Julio.

Komisariu ne'e haktuir tan katak hafoin entrega fujitivu hirak ne'e ba POLRI prosesu tuir mai maka deporta legalmente husi parte imigrasaun hodi kumpri pena.

Kronolojia kazu, PNTL liu husi Servisu Investigasaun Kriminal (SIK) hamutuk ho Unidade Polisia Maritima (UPM) kaptura fujitivu nain rua iha (23/06) tuku 10:00 dader iha Portu Dili tanba tama teritoriu sem vistu.

Hafoin kaptura PNTL kordena direktamente ho Prokurador Jeral Republika (PJR) no PJR fo kedas orientasaun ba SIK atu halo prosesu tuir prosedimentu ne'ebe iha.

Nikola Ilief (43) husi Bulgaria no Sayed Mohammed Said (31) husi India komete kazu branqueamento capitais no kazu Narkotika, fujitivu nain rua halai husi prijaun Kerobokan Bali, Indonezia iha Segunda (19/06) ho maneira ke'e rai halo kuak hanesan valeta depois tama tuir to'o iha estrada Merthanadi Kerobokan Bali hafoin mai husi Alor ho ro peska no kaptura iha Dili iha (23/06).

PNTL Asegura Seguransa ba Prosesu Eleisaun Parlamentar

Polisia Nasional Timor-Leste (PNTL) husi nivel nasional to'o munisipiu asegura seguransa ba Kampaña no Eleisaun Parlamentar periodu 2017-2022 hodi fo seguransa ba Sidadaun sira nia partisipasaun politika no ezerse direitu de votu.

Liu husi serimonia formatura jeral deslokasaun forsa parada ELPAR iha Kuartel Jeral PNTL Kaikoli Dili Kinta (20/07) Forsa seguransa Eleisaun Parlamentar (ELPAR) ohin desloka ba munisipiu 12 hodi fo seguransa ba festa demokrasia ne'e.

Segundu Komandante Jeral PNTL Komisariu Faustino da Costa enkoraja membru tomak tenke mantein disiplina no rona ordem orientasaun ne'ebe Komandante munisipiu sira fo.

"Komandu fo orientasaun ba Komandante no membru tomak katak PNTL kumpri saida maka lei eleitoral define no tenke garante katak povu tomak iha asesu atu ba vota ho seguru no hakmatek labele iha ema ida impede ema seluk atu labele vota."

Total membru ne'ebe maka fo seguransa ba ELPAR hamutuk nain 3849 kompostu husi Unidade Especial Polisia (UEP), Unidade Polisia Maritima (UPM), Unidade Polisia Forteira (UPF) no membru husi Kuartel Jeral inklui Servisu Imigrasaun, alende ne'e iha mos ekipa reserva iha Komandu Jeral ne'ebe maka sei alerta no forsa reserva husi UEP ne'ebe maka prontu fo apoiu bainhira mosu situasaun emerjensia..

PNTL sei koloka membru iha kada Sentru Votasaun minimu ida no maximu rua depende ba ba risku no grau amiasa ne'ebe maka PNTL identifika.

Liu husi Orsamentu Fundu Dotasaun Tudo Governu Komandu PNTL aluga kareta hamutuk 50 hodi fasilita membru sira ba munisipiu,

Antes termina Komisriu ne'e husu ba povu tomak atu lalika tauk hakat ba Centru Votasaun ne'ebe besik no vota ho konsiensia no lalika tauk tanba Polisia sei asegura seguransa maximu ba festa demokrasia ne'e no prontu atua bainhira nesesito no karik iha situasaun emerjensia ruma liga numeru emerjensia PNTL 112.

Atu realiza festa demokrasia ne'e lao ho seguru Polisia Nasional Timor-Leste kordena ho orgaun eleitoral Comisaun Nasional Elisaun (CNE) no Sekretariadu Tekniku Administrasaun Eleitoral hodi halo sosialisasaun Lei Eleitoral Lei Nu.9/2017 no fahe informasaun kona-ba krime eleitoral ba Komandante PNTL munisipiu 13 no Komandante Unidade sira kona-ba oinsa PNTL bele halo atuasaun tuir regra no lei haruka durante kampaña no Eleisaun Parlamentar.

Alende ne'e iha nivel munisipiu hala'o mos workshop hamutuk ho Lideransa Partidu Politiku, Lideransa Komunitaria, Joventude no veteranus sira hodi transmite informasaun ba Autoridade munisipal, Xefe suku, Xefe Aldeia no OPS sira atu hatutan ba comunidade no joventude sira nune'e prosesu Eleisaun Parlamentar bele lao ho seguru no susesu.

Komandante PNTL munisipiu Aileu Superintendente Damião Alves Correia hateten Komandu PNTL munisipiu Aileu prontu atu asegura seguransa ho rekursu ne'ebe maka iha ho apoiu husi Unidade Especial Polisia (UEP) no Kontinente Jeral husi Komandu Jeral no Kompania ida husi F-FDTL.

Superintendente Damião husu ba lider politiku sira liu-liu kordenador Partidu iha nivel munisipiu atu fo hanoin ba militante no simpatizante sira bainhira tuir kampaña tenke koopera ho autoridade seguransa atu kumpri Lei Tranzitu labele lori motor kanu resin no halo barullu, lori motor tenke iha dokumentus, uza kapasete no lao tuir koridor wainhira halo pawai nune'e labele mosu asidente trafiku.

Tuir kalendaru operasaun eleitoral ba Parlamentu Nasional kampaña iha durasaun loron 30, (20 Juñu to'o 19 Jullu) no Eleisaun Parlamentar iha loron 22 Jullu.

PNTL assegura seguransa ba fatin, comunidade, Partidu Politiku no ba instituisaun iha munisipiu hotu no esforsu makas hodi asegura seguransa ba Kampaña Parlamentar 2017 hodi lao iha ambiente pas no hakmatek atu nene povu Timor-Leste bele ejerse sira nia direitu.

Entertantu Komandu PNTL estabesele Sentru Operação Segurança Cordenada (COSC) PNTL ho F-FDTL hodi asegura Eleisaun Parlamentar.

Komandante Jeral PNTL Komisariu Polisia Julio da Costa Hornay hateten seguransa ba eleisaun ne'e em koordinada no PNTL maka iha oin hodi fo seguransa iha periodu kampaña no iha sentru votasaun, no ita nia forsa prepara kedas iha kotuk no prontu fo apoiu.

PNTL ho Falintil Forsa Defeza Timor-Leste (F-FDTL) hanesan aparelu estadu nian, ami decide hodi kria seguransa em koordinada hodi apoiu malu asegura Eleisaun Lejislativa lao ho susesu, mesmu forsa 2 ne'e iha nia misaun keta-ketak PNTL seguransa interna no F-FDTL seguransa externa maibe iha ami nia lei organika hateten atu servisu hamutuk no koopera malu bainhira prezisa.

PNTL no F-FDTL em koordinada hala'o patrullamentu liu-liu iha areas riskus ne'ebe identifikadu, to tomada de pose governu foun, tuir planu operasaun ne'ebe feitu tiha ona. Alende ne'e halo mos cek poin hodi pasa revista sasan kroat, armas brankas, atributus arte marsiais no seluk-seluk tan ne'ebe lei Nu. 5/2017 bandu no nia implementasaun rigoroza.

Iha sorin seluk Xefe Estadu Maijor Jeneral F-FDTL Brigaderu Jeneral Lere Anan Timur, hateten membru PNTL no F-FDTL koopera no koordena iha area seguransa durante prosesu Eleisaun Parlamentar hodi fo susesu ba festa demokrasia ne'e.

"Hau fo barani ba Forsa Armadas no Polisia Nasional Timor-Leste atu servisu ho profesionalismu no responsabilidade lalika tauk, ordem ne'ebe tun kumpri tanba ami hatene komanda imi, ami mos hatene responsabiliza ba imi nia sala," Brigaderu Jeneral Lere apela.

Ita espera katak Eleisaun parlamentar sei lao ho susesu, povu konsiente ho responsabilidade hodi hili ninia lideransa atu ukun nasaun ne'e, tau ass ita nia prinsipu nasionalismu, hadomi o nia rai no o nia povu, patriotizmu tenke iha sidadaun hotu tenke respeita lideransa, simbolu no lider sira no susesu ba ita nia operasaun ne'ebe atu hala'o.

Tanba ne'e ami husu ba ema hotu-hotu nu'udar Timor oan husi katuas no ferik, mane no feto, labarik no joven, estudante no analfabetus, rai nain no estrangeirus ne'ebe moris ka hela iha rai Timor-Leste atu hotu-hotu kontribui ba pás no estabilidade, espesial liu iha prosesu eleisaun ida ne'e hahu'u husi prosesu kampanha to'o eleisaun no tomada de pose VII governu konstitusional.

Prosesu eleisaun ne'e prosesu politiku rai ida ne'e nian ne'ebe importante tebes tenke lao ho susesu iha ambiente ne'ebe pás no dame, tanba ne'e laiha toleransia ba individu ka grupu ruma maka koko atu kria instabilidade ka kria problema ruma iha ambiente eleisaun ida ne'e

Ita hakat liu ona eleisaun Prezidensial ho susesu, iha estabilidade, hakmatek no ksolok nia laran no iha Fulan Jullu tinan ne'e sei hala'o Kampaña no Eleisaun Parlamentar ne'ebe diferente utuan ho Eleisaun Prezidensial, iha eleisaun Parlamentar partidu 21 resin maka sei halo kampanha hodi hato'o ninia programa politika.

Photos : Melquiades do Nascimento/PNTL



NOP Reforsa Baze Legal Servisu Iha Nivel Komunitade

Normas Organizasaun no Prosedimentu (NOP) reforsa baze legal servisu Polisia iha nivel munisipiu no suku hamutuk ho comunidade no autoridade lokal sira.

Komandu Polisia Nasional Timor-Leste (PNTL) halo lansamentu NOP ba Ofisial Polisia Suku (OPS) Konsellu Polisiamentu Komunitaria (KPK) Konsellu Seguransa Munisipiu ka Rejiaun (KSM/KSR), nune'e bele regula no haforsa sira nia servisu.

Segundu Komandante Jerál PNTL Komisariu Polisia Faustino da Costa hateten Polisiamentu Komunitariu koloka no hatu'ur nanis ona iha Lei Organika PNTL Dekretu Lei Nu. 9/2009 Artigu 1.2 ne'ebe hateten PNTL iha nia estratejia no filosofia polisiamentu ho karakteristika Polisia Komunitaria, maibe nia organizasaun, disiplina, instrusaun no estatutu pessoal nia natureza idêntica militar maibe laos military.

Lei ne'e nudar baze legal ba PNTL no ikus mai dekreta tan iha Planu Estratéjiku PNTL 2014-2018 ne'ebe define modelu Polisiamentu bazeia ba VIP (Vizibilidade Involvementu no Profesionalismu).

"Atu implementa no haforsa servisu seguransa interna ho modelu VIP tuir Estadu, Governu no Povu Timor-Leste nia mehi maka presija naroman, dalan no meius ida oinsa atu bele ezeekuta ida ne'e ho diak," dehan Segundu Komandante Jerál PNTL.

VIP sai hanesan doutrina ida maibé OPS, KPK no KSM/KSR presija mós koloka no hatu'ur tuir estrutura hirarkia nune'e ho identifikasaun konsege deteta, maka parseiru hamutuk ho departamentu Polisiamentu Komunitaria konklui NOP ba KSM/KSR, KPK no OPS.

- Objektivu NOP ba OPS hanesan instrument legal ba OPS hodi implementa filozofia Polisia Komunitaria no mos sai matadalan no lalaok no servisu OPS, hodi hala'o sira nia kna'ar no garante estabilidade iha comunidade tuir modelu Polisiamentu Komunitaria.
- Objektivu NOP ba KPK atu hatur baze formal ba kolaborasaun entre PNTL liu husi OPS ho lideransa Komunitaria no autoridade lokal sira seluk iha KPK nia laran hodi garante estabilidade no seguransa iha suku.

- Objektivu NOP ba KSM/KSR atu hatur baze formal no sai nu'udar matadalan hodi esplika kona-ba lalaok KSM/KSR atu hare'e ba kna'ar no responsabilidade husi Konsellu no hametein kolaborasaun entre PNTL liu husi Komandante munisipiu no rejiaun ho autoridade lokal iha munisipiu hodi garante estabilidade no seguransa iha munisipiu no rejiaun.

Manual NOP nia modelu hanesan livru tanba ne'e presija ita hotu atu le'e labele tau deit iha biblioteka tanba Komandante munisipiu sira nia partisipasaun ideia ka hanoin hakerek iha livru ne'e nia laran.

Iha fatin hanesan direktór Departamentu Polisiamentu Komunitaria Superintendente Assistente António da Luz iha nia intervensaun hateten hafoin lansamentu ne'e tuir planu sei halo formasaun ba Komandante Eskuadra no Seksaun Polisia Komunitaria iha munisipiu atu koñese no kompriende didiak NOP ne'e hodi fo informasaun ba OPS sira atu sira halao kna'ar ho diak.

Komandante da Luz hato'o agradese wa'in tanba liu husi prosesu lubuk ida durante fulan hirak nia laran ita esforsu hodi halo servisu hamutuk ho parseiru husi The Asia Foundation (TAF) no Polisia Nova Zelandia desenvolve NOP ba OPS, KPK no KSM/KSR.

Iha okajiaun ne'e Sara Dewarst Xefe HAKOHAK husi TAF hateten haksolok tebes ho lansamentu NOP ne'e signifika katak buat hotu sai PNTL nian no lidera husi PNTL rasik tanba PNTL investe ona orsamentu hodi prepara prosedimentu no manual treinamentu.

Nia haktuir tan katak nu'udar parseiru prontu nafatin atu apoiu iha area ne'ebe maka PNTL husu ba monitorizasaun no implementasaun NOP ida ne'e liu-liu apoiu treinamentu, planeamentu, planu estratéjiku nivel munisipiu husi Fundasaun Azia no NGO BELUN.

Partisipa iha lansamentu ne'e maka Segundu Komandante Jerál, Embaixadora Nova Zelandia, Komandante PNTL munisipiu 13, parseiru desenvolvimento sira hanesan TAF, BELUN, JICA, Polisia Nova Zelandia, Diresaun Nasional Administrasaun- Ministeriu Adminitrasaun Estatal (DNA-MAE) no konvidadu sira.

PNTL Implementa Lei Nu. 5/2017 Hodi Redus Krimi

Polisia Nasional Timor-Leste (PNTL) implementa Lei Nu.5/2017 rejime juridiku ba pratika Artes Marsiais, Rituais, Armas Brancas no Rama Ambon hodi redus krime no konflitu entre Arte Marsiais.

Lei Nu.5/2017 koalia asuntu haat inportante kona-ba regulasaun ezersisio no pratika Artes Marsiais, inportasaun, komersiu, detensaun, posse no utilijasaun Armas Brancas, defenisau Rama Ambon hanesan arma ida ne'ebe bandu, no Alterasaun Codigu Penal artigu 211.

Lei Nu.5/2017 aprova iha Parlamentu Nasional iha loron 6/03/2017 no promulga husi Prezidente Republika iha loron 12/04/2017 ho artigu hamutuk 43. Lei ne'e hanesan lei espesifiku (Lex Especialis).

Ministru Interior Longinhos Monteiro hateten PNTL assume responsabilidade maximu atu implementa lei ne'e iha teritoriu nasional, tanba ne'e presija kompriende uluk kontiudu no pratika husi lei ne'e nune'e implementa iha terrenu ho diak, Nia hato'o asuntu iha intervensaun abertura Sosializasaun Lei Nu. 5/2017 iha Hotel Ramelau Aimutin foin lalais.

Nia haktuir tan katak orgaun rua maka responsabiliza ba lei ne'e maka PNTL, orgaun Polisia seluk no Komisaun Reguladora Artes Marsiais (KRAM) iha parte Administrativu nian.

Lei Nu.5/2017 nu'udar meius ida hodi solusiona kazu Artes Marsiais, utilizasaun Armas Brancas no Rama Ambon ne'ebe maka hamosu kauza ema lakon vida no estraguso ba uma no sasan ne'ebe maka Polisia assume responsabilidade atu asegura no defende, maske laos fasil maibe wainhira ita hotu hamutuk ho hanoin ida deit la susar.

Iha okajiaun ne'e Segundu Komandante Jeral PNTL Komisariu Polisia Faustino da Costa hateten Komandante sira presiza intende didiak lei ida ne'e tanba iha kapitlu VI kona-ba Uzu Forsa artigu 35 to'o 38 katak fo kompetensia ba Poisia atu tiru bainhira la rona autoridade Polisial ou Polisia seluk nia intervensaun iha terrenu, tanba ne'e maka ita sosialija didiak ba Komandante sira para kompriende.

Komisariu ne'e haktuir tan katak Lei Nu.5/2017 forte ba interese nasional hodi asegura povu no nasaun tanba ne'e PNTL, orgaun Polisial no KRAM nu'udar orgaun fiskalizador tenke implementa lei ne'e ho diak.

Entertantu Prokurador Jeral Republika Jose da Costa Ximenes iha nia intervensaun hateten Ita nia prespetiva ba lei ida ne'e hanesan resposta diak ida ba problema Artes Marsiais ne'ebe maka dala barak uza Armas Brancas no Rama ambon hodi halo krime sei iha solusaun ruma, alende ne'e mos bele sai instrumentu foun ida ba ita hotu hodi uza hahu iha nivel investigasaun.

Prokurador ne'e esplika liu tan katak tuir lei Arte Marsiais tenke hetan autorizasaun husi KRAM se la iha autorizasaun maka uza fardamos kriminaliza, enkuantu Rama Ambon kompletamente kriminaliza nia produsaun, lori ou subar, transfere no faan sei hetan pena prijaun tinan 4-8 no agravaun to'o tinan 10.

"Hau sujere laos iha ne'e deit maibe Komandante munisipiu sira aproveita oportunidade ne'e hodi diskuti, hanesan formasaun no shering kona-ba lei ida ne'e nia implementasaun hanesan prevensaun ida tanba tuir lei ida ne'e mesmu fo papel inportante ba PNTL hodi halo prevensaun laos liu husi sosializasaun deit maibe periodikamente PNTL bele halo operasaun ba trenu fatin no fatin seluk ne'ebe ejisti Artes Marsiais," dehan Prokurador Jeral.

Espera katak lei ida ne'e sei reforsa liu tan no sai instrumentu ne'ebe Polisia bele kaer no Ministeriu Publiku bele uza hodi halo prosesu kontra ema sira ne'ebe involve iha atividade hanesan ne'e.

Socializasaun Lei Nu.5/2017 diriji husi Ministru Interior akompaña husi Komandante Jeral PNTL Komisariu Polisia Julio da Costa Hornay no Prokurador Jeral Republika ho Partisipasaun maximu husi Komandante PNTL munisipiu 13, Komandante Unidade Polisia Fronteira (UPF), Komandante Operasaun Unidade Especial Polisia (UEP) Komandante Polisia Militar (PM), representante F-FDTL, Diretor Jeral Alfandega, KRAM no Funsau Publika.

Entertantu iha parte seluk autoridade lokal sira mos asumi kna' ar inportante atu sosializa lei ne'e ba comunidade liu-liu iha suku ne'ebe maka risku ba konflitu tanba ne'e iha loron Sexta 9 de Juñu Autoridade lokal suku Madohi sosializa lei 5/2017 ba comunidade sira iha suku ne'e.

Xefe suku Madohi Benardino da Cristo Trindade, hatete ita presiza sosializa no informa ba joventude no ba inan aman sira atu iha kunhesementu hodi fo hanoin ba sira nian oan sira atu komprende hodi hamenus problema no konflitu iha suku laran.

Socializasaun lei ne'e involve joventude sira husi aldeia walu (Rosari, Tasi-Tolu, Terra Santa, Anin Fuik, Loro Matan, Beto Tasi, Beto Naroman, Beto-Leste).

Iha parte seluk Xefe Joventude Aldeia Naroman Paulo Lemos Maia, hatete atu hamenus no prevene konflitu joventude sira presiza iha kunhesmentu klean konaba lei ne'e nune'e faze pur faze sei muda mentalidade joventude sira ne'ebe durante ne'e risku ba konflitu.

Nia mos garantia lei ne'e tanba, tuir nia nasaun ne'e presiza joventude ne'ebe kreativu no buka aprende buat diak hodi kontribui ba dezemvolvmentu iha rai laran.



JORNAL da REPÚBLICA

PUBLICAÇÃO OFICIAL DA REPÚBLICA DEMOCRÁTICA DE TIMOR - LESTE



Komandante Komandu Administrasaun PNTL Superintendente Xefe, Mateus Fernandes sai Komandante parada iha loron aniversariu PNTL ba 16 iha CFP-Comoro

Photo: Ajente Estevao Pereira/PNTL